


A logra haya placa pa trahadornan di Brenchie's

pero tin seis edificio ainda pa bende



ORANJESTAD(AAN): E proceso di bancarota di Brenchie's ainda no a termina. Ainda por corda con e compania aki existiendo pa algun decada a cera lagando tur hende sin trabao. Nan tin basta propiedad den Playa den Wilhelminastraat. Dakota cual a wordo bendi caba. San Nicolas a wordo bendi tambe. Tur loke a ser bendi a sosode despues di bancarota. Ainda ta saliendo avisonan di findishi y ta buscando manera pa paga e trahadonan cierto suma cu nan tin derecho riba dje. Mr Jeannot de Cuba abogado ta curator den diferente caso relaciona cu e ex negoshi aki y kende siman pasa a pone un aviso yamando empleadonan cu tin derecho riba cierto pagonan ainda. Tabata dos aña pasa cu B.J. Arends & Sons Groep NV a bati bancarota y desde e tempo ey a bin ta trahando un

inventario di propiedadnan pa despues trata di bende nan na un prijs mas halto cu ta posibel. Naturalmente mester inventarisa loke tin na debe na e trahadonan tambe den e proceso aki. Despues di e faillissement a logra bende articulonan los cu tabatin den e negoshinan ainda y den deposito den vindishinan publico. Den e periodo aki mester a raporta na Corte tur resultado. Door di e estado di e edificionan y e situacion na Aruba, e crisis, no a logra bende e seis edificionan na Playa. Ademas di e hecho cu no ta asina facil awendia pa banco duna un prestamo asina grandi. Pero si a logra recupera suficiente fondo pa por haci un pago di seis siman na e trahadonan. E seis siman ta loke a uza pa finalisa e relacion di trabou cu tur empleado. Ta papiando di un suma total di 275 mil florin cu ta banda di

e pago di cesantia cu e empleadonan a haya aña pasa caba. E pago aki a wordo haci door di SVb, pero e cobranza mester wordo entrega na e Curator cu lo mester paga esaki tambe. Jeannot de Cuba tabata curator di varios caso di bancarota grandi. Manera esun di Air Aruba y ALM cu tabatin un dimension internacional. Awor den e caso aki, segun Jeannot de Cuba, e tabata diferente. Na Aruba pa standards Arubiano B.J. Arends ta un caso grandi mirando cu tin 68 trahador, di cual un grupo grandi tin hopi aña di servicio y ainda no por haya trabou, y hopi real estate. Tin un historia grandi di un compania cu lo a cumpli 75 aña na momento cu nan a bati bancarota. E tabata un perdida di conocimiento. Pues e tabata grandi pero pa normanan local. E compania

di B.J. Arends and Sons a laga atras tambe hopi debe aunke tabata tin su trayectoria grandi. Hopi biaha companianan cu tin propiedad di inmueble, ta uza esaki pa haya prestamo. Esaki a pasa pa hopi aña y derecho di hipotecanan a wordo pasa y hopi di esaki lo bay come bo cash flow. Cu tempo asina lo haya problema cu no por cumpli mas cu obligacionnan. Y no por haci mas inversion. Esaki ta loke a pasa tambe cu B.J. Arends and Sons. Jeannot de Cuba a splica cu a cana e proceso publico pa logra haya tur e hendenan cu tin derecho riba esaki. Y tur hende mester por wordo identifica debidamente. Pesey a plame riba un periodo y no pa tur 68 empleado pareu. Di e manera aki lo minimalisa e eronan. E bancarota di mas grandi tabata di Air Aruba y duro pasobra el a sosode algun siman prome cu Pasco. Bayendo pa e caso di B.J. Arends & Sons bek, e curator a bisa cu en realidad e ta cla pa cera e caso y cu

definitivamente a yega na e punto cu Brenchie no ta existi mas. Pero, loke ta wanta nan man un poco aworaki, ta e hecho cu hopi di e propiedadnan no a wordo bendi ainda. Tanten cu esey ta bendi, no por cera e caso. Na inicio di april algun edificio lo bay vindishi, y lo dura un seis luna mas. Pero asumiendo cu nan lo wordo bendi. Pasobra no tin mucho interes, mirando e economia awor. Y esnan cu tin derecho di prome hipoteca kier un suma mas grandi di loke mercado ta desea di paga. Y na mes momento banconan ta hopi mas cauteloso pa duna fianza y esnan cu ta interesa pa cuntra, no ta semper tin un idea fiho di e potencial di loke nan kier cumpra. E personalmente ta mira potencial den contexto mas grandi, principalmente awor cu Gobierno ta trahando riba urbanizacion di centro. E ta e momento oportuno pa desaroyonan cu ta kere den vision y urbanizacion por wordo hinca den e contexto aki.

Telefonan di DIARIO
582-6747
Fax: 582-8551